

證治要論

證治要論

醫學報社同人撰

同社裘吉生編刊

陸九芝厥陰熱利寒利辨書後

山雷

自利利下之症以迅利滑利爲義有急溜直奔一泄無餘之勢今之所謂泄瀉也其症惟陽明熱迫及暑天濕熱下注有熱利二層而三陰病之完穀不化洞注清澈皆屬眞寒若欲下而窒滯不爽裡急後重所下黏穢紅白稠雜則素問名爲腸澼後人謂之滯下（澼當作辟實借作襞積之襞有積聚之義此病皆由濕熱垢穢積滯腸中使然今吳下俗語以所下紅白爲別謂之紅積白積頗覺名實相副古書腸澼之澼集韻訓爲腸間水殊不可解惟浙局重刻明顧氏仿宋本素問王注尙有作腸辟

者宋林億等有校語曰辟全元起本作澼知林等所見王啓玄本固是辟字而腸中積滯之義乃昭然若發蒙然後知後人加以水旁之未盡妥協而集韻之訓詁竟是望文生義率爾杜撰定不足據此古刻書籍有所以大可寶也一其症惟休息久痢時發時止有氣虛下陷一候宜乎補中舉陷兼養肝腎之陰若外熱傳裡及暑濕停滯皆濕與熱蒸釀成膿血無不宜於苦寒蕩滌者也斯二症者古者一稱自利一稱腸辟一多虛寒一多實熱病名病狀皎然不同固不慮學者有所誤會惟至仲景傷寒論中則止有自利下利之名而無所謂腸辟滯下者初學讀之每難識別實則陽明之自利爲協熱之泄瀉太陰之自利爲中寒之泄瀉少陰屬寒水之藏則吐利下利無非虛寒即有便膿血者亦非濕熱蘊結之滯下所以藥用乾薑石脂之桃花湯至厥陰諸利則有熱亦復有寒其厥而下利且便膿血者熱利下重者皆熱邪之腸辟也其下利清穀戴陽格陽者皆寒中之泄瀉也九芝此論分別厥陰之寒利熱利

已極明晰惟於泄瀉滯下二者猶未顯爲揭出頗恐初學讀之止見有一利字最易爲其所眩爰爲之更申一義若夫利下滯下二者之孰爲虛寒孰爲實熱則仲聖本論言之已詳而臨證之時復於切脈辨證之餘詢其所下之臭穢黏稠及夫清澈希水之間均已得其底蘊又何患乎證情不易辨別耶

陸九芝論臨證指南內閉外脫四字之誤書後

山雷

九芝此論本爲犀角升麻辨之第三篇故引聶氏治痘疹在當用升麻葛根解表之時誤投牛黃表邪內陷必不可救而又引韋氏邪在陽明雖有神昏不得以犀角引賊入室一節則陽明神昏之時已非升麻解表之證韋氏所謂失表所致表不解而入內者乃指未神昏以前失於解表馴致熱入陽明而爲神昏初非謂陽明熱熾之神昏尙可用聶久吾之升麻葛根法也其下則專爲葉氏指南內閉外脫四字糾正大誤謂爲當作外閉內脫卻是爲陽明熱結之病浪投犀角牛黃引邪深入及至寶

紫雪腦麝耗氣者繪出症情曲而有致蓋熱在陽明而爲神昏或爲痰氣之鬱結或爲燥矢之未行其症確是閉證但閉在胃腑總在五臟之外則止可謂之外閉斯時之心臟依然發血迴血隨氣而行本無所謂閉也惟葉氏誤於溫熱傳手不傳足一句謬以陽明閉證認作心胞終不肯一泄胃家熱結而妄用清心香竄諸藥則胃之閉塞者愈窒愈結心之不閉者大開大泄元氣耗散乃爲內脫是外之閉者病爲之而內之脫者醫爲之也須知芳香開竅辟除穢濁一法在疫病時間天地惡厲之氣非此不除而尋常溫熱病中應用絕少乃葉氏治案頗喜用之且用之多不得當此葉氏所以慣言脫之一字而並不知其所以脫者卽其藥力有以造成之也惟頗頗嫌九芝此文於外閉二字不從陽明胃實着想誤以散表解外立言則於溫熱病情亦易貽誤要知溫病熱病即在陽明表熱宜從外解之時升麻葛根升發太猛用之過度爲害甚巨九芝於陽明經熱腑熱二層辨證用藥均極穩愜獨於陽明表證推

重葛根不無流弊如本篇中一則云疏達肌表再則云輕揚散表頗似陽明神昏之時尙宜如此治法則界限太不分明初學讀之尤易誤會卽其以命題之犀角升麻互相比較有以啓此弊竇何如竟以葉氏內閉外脫爲題則所謂內者卽是心臟不當開而妄開之所以致脫其所謂外者是指胃腑當通而不知通所以愈閉蓋旣在胃熱神昏之時固已萬無輕揚散表之治法矣

肝生於左肺藏於右解

張山雷擬

粵自歐風墨雨浸灌亞東論醫學者每多見異思遷喜新厭故徒羨其器械之精美解剖之細微詫爲實地試驗得未曾有遂爾鄙夷舊學譏其理想視若空談其甚者且撫拾一二陳言指斥乖謬以爲中醫舊說并臟腑部位而未之審遑論乎病理藥理之適用與否此素問刺禁論肝生於左肺藏於右二語幾爲新學家集矢之鵠庸詎知古人之言固未嘗誤彼囂囂然號於衆曰某臟如此某腑如彼亦止能以迹象

求之而不可與語精神之化育也乎夫以臟腑之所在言之肝居右脇肺位胸中固是一成不變之定位縱古先聖王親親仁民決不忍擾及屍骸剖殘形體然致知格物既以悟徹造化之淵微何致并此瑩瑩大者而不能辨蓋天地之氣運陰陽之幹旋在左者升在右者降而人在氣交之中恒與天地陰陽同此消長惟肝稟生發之性以動爲用喜條達而惡抑鬱有如春令上行萬物萌動所謂東方風木入通於肝者正以暢茂扶疏合德於木非謂剛果之肝臟竟如喬木之干霄而蔽日也則其氣升騰所治在左不亦宜乎惟肺稟凝肅之性以靜爲用宜順降而畏上逆有如秋令下行萬物收斂所謂西方燥金入通於肺者正以清肅靜順合德於金非謂嬌柔之肺臟果如五金之顛扑而不破也則其氣順降所治在右亦其常耳此固以德性言之以運用言之推究其氣化之周旋而初非指定其形骸之位置奈何謬柱鼓瑟之儔猶欲刻舟以求按圖而索宜乎終其身於夢夢之中而不能悟也且善讀書者自

當融會大旨求其貫通萬不能摘句尋章致多眩惑此節肝肺二句猶幸有左右之
迹象可徵而若輩得以吹毛求疵肆其狂瞽然素問全章更有心部於表腎治於裏
脾爲之使胃爲之市云云吾不知陋者讀之更復作何夢想亦知吾邦醫學危微精
一自有心傳果能悟徹玄機始可與言造化存神之妙惟彼笨伯競效盲人扣槃捫
燭之見而猶敝帚自珍矜爲創獲不其愼耶達者視之亦當笑其狂而憫其愚也

內經謂肝左脾右解駁議

慕陶褚淵明

鹽山張君錫純著肝左脾右解一篇詳徵博引可謂不憚詞繁矣然愚魯如僕竊有
不然者敢書之以質張君夫內經謂肝左脾右固明言臟腑位置也古以解剖術不
精致錯臟腑位置貽誤後學傳笑西人已無可隱遁而張君謂肝雖居左其氣化實
先行於右脾雖居右其氣化實先行於左并引日之東升春之東來籐蔓附物而生
自右盤左以證氣化左行於右之說僕一經研究殊乏價值蓋內經著者本旨果如

張君所解其措詞必曰雖定肝位于左其實在右因氣化先行于左故從左也雖定脾位于右其實在左因氣化先行於右故從右也既無此語其根本錯誤已可瞭然錯誤既明吾人應知更正而張君非特不更正左右之錯誤尙欲以不充分之學理爲內經曲辯僕亦不憚詞繁謹逐件說明引證之不足憑焉張君謂日之東升猶肝之氣化先行於左然日非繞地球而行乃地球繞日而行東升之說已屬錯誤此不足憑者一也張君謂春氣東來（律管飛灰是其明徵）亦猶肝之氣化先行于左然漢書律曆志載律管飛灰爲候節氣之法氣至者灰動何律灰動卽爲何候固未言春從東來此不足憑者又一也張君謂籐蔓附物而生自右盤左如肝之氣化由右而左然物無正反可別其左右何從分折此不足憑者又一也至謂投補肝之劑而左脈漸起更屬無稽試查脈經左關一脈非爲主肝乎謂肝主怒若吾人盛怒之際試按六脈弦急如索肝果主怒何怒時肝脈不單現其狀乎此不足憑證者又一也

拙觀張君全篇之意盡託虛詞無實旨可尋內經一書根本既已錯誤更正之則可若徒恃空言曲爲解辯於內經誠爲功臣於後學其爲罪臣也乎

續解兒難

臨安周肇岐

吳翰通先生之作解兒難也謂小兒一難於天時再難於人事是解小兒直接天人之難也今予之續解兒難也亦謂小兒一難於天時再難於人事是解乳兒間接之難也間接者何不觀乎嬰兒自離母腹之後非以母之乳汁爲兒之命脈乎乳汁由母體氣血之所化母之氣血熱則其乳亦熱母之氣血寒則其乳亦寒母壯乳壯母衰乳衰兒之與乳如影隨形此事理之顯也奈何世之業兒科者一見兒病便治其兒更不問其母體之若何須知乳兒有病當先察母母果有病必先治母兼治其子母病旣安兒病自可迎刃而解矣不知乳兒懸命于母兒之體質每遂母之體質爲轉移夏月蠅飼蚊囓之餘人受之猶爲傳染疾病之媒介况兒日飲母乳終歲無間

乳母有病有不遺傳其子之理乎顧業醫者可不先問母體之如何而後再覘乳兒之病狀爲印證耶每見乳兒本無外感母患外感因飲母乳而兒患外感者有之乳兒本無內傷母患內傷因飲母乳而兒患內傷者有之不明母兒間接天人之理欲其投劑輒效保赤無傷者鮮矣兒既啞口有口難言母既不知醫又不察今余代兒先告其母并以告醫余於是而續解兒難

〔一〕告懷孕之母 兒乳未斷母又懷孕兒食母乳多成疳疾若不先究病源妄投疳藥因而殞命者多矣考之此症惟葉氏幼科要略疳疾門略載數語謂小兒常有繼病治之無效待妊婦產過自愈云云又眉間徐批謂小兒爲孕婦所抱則生繼病實有此事但云理不可解而已均無治法後見幼幼集成諸疳門載有魃病一症謂兒將週歲母復有妊兒飲其乳爲之魃乳以成此證或有母患別病兒飲其乳以類母病者有之其候寒熱時作微微下利毛髮鬚鬣意殊不樂甚則面色痿黃腹脹青

筋瀉青多吐日漸羸瘦竟成疳證俗以孕在胎中因兒飲乳其魄識嫉而致兒病故爲之胎妒龍胆湯此幼幼集成論魑病之治法也後考魑字之義據康熙字典魑音奇鬼服也一曰小兒鬼又（急就篇）射魑却邪除羣凶〔註〕天剛卯也以金玉及桃木刻而爲之一名欬改其上有銘而旁穿孔系以綵絲用繫臂焉亦所以逐精魅也此康熙字典魑字之訓詁也愚謂魑病旣因兒飲孕母之乳而成疳疾可知魑猶忌也胎兒妒外兒之飲母乳也余嘗留心此症亦有兒飲孕母之乳其兒安然無恙者但飲孕乳之兒不患魑病者其胎兒性質異日必然和平患魑病者胎兒腹量異日必然窄小可預知也由是觀之可知孟言性善荀言性惡之說各有見地人之有良無良已造端乎母腹胚胎之始有斷然矣今胎兒尙在母腹已具有妒忌之性雖敢怒無形其乳已成爲魑乳外兒食之安得不中其毒況此時胎在母腹主權在母母固未嘗有偏愛彼此之分其間接感應母乳之理有如此而況乳母躬自有病躬自

偏性其乳更當何如可想見矣故治兒疾者不可不先察母體懷胎孕者不可不顧及乳兒觀龍胆湯一方實爲平肝火理脾開鬱之劑大凡妒者多鬱肝脾受戕以兒飲妒乳而成疳疾投以龍胆湯宜其應手輒效無如兒患慙病者正復不少人多忽之茲特表而出之噫徐葉所謂繼病實慙病猶謂待妊婦產過自愈理不可解云云醫豈易言哉

附龍胆湯〔治小兒慙病〕

龍胆草 一錢 鈎藤鈎 一錢 北柴胡 一錢 芽桔梗 一錢

赤芍藥 一錢 正川芎 一錢 官揀參 一錢 白雲苓 一錢

炙甘草 五分 井水煎服

按小兒慙病旣因飲孕母之乳而成疳自宜急令乳兒斷乳爲要

外以夜明砂不拘多少以紅紗作一小袋盛之繫兒胸前〔按此亦釋慙字之意〕

〔一〕告乳汁自流之母 乳汁時常自流不知者以爲乳母氣血壯盛滿而溢出多不介意不知乳汁自流大耗氣血實亦病也可治而愈治之之法當分熱溢虛溢二種熱溢者其乳氣必極臭其乳汁必濃濁再察母體必有熱象可證虛溢者其乳氣亦腥淡其乳汁亦清薄再察乳母亦必有虛證可參兒飲熱乳遺染熱證兒飲虛乳兒難長育如遇此等乳汁皆當調治乳母爲要若不爲意而忽之非但小兒必有疾病之患即乳母異日亦必有血枯經閉之慮可不畏哉若因熱而溢者當清胃熱爲主以乳汁爲陽明氣血所化且乳房本爲胃經所過故治熱溢者不可不先清胃熱如人參白虎湯或玉女煎之類但石膏宜煨用不可生用胃熱一清乳自不流虛溢者法當大補氣血爲主但使氣血壯盛乳汁自有收攝之力如人參養榮或十全八珍遂母體之宜而調補之乳自收矣

〔二〕告乳汁不行之母 乳汁不行當審其婦之虛實虛者宜補實者宜通每見世

俗乳母無乳概用姜蠶通草王不留行等強逼之法逼之不下遂諉於命豈知乳汁由於氣血所化耶氣血衰而強逼之何異竭澤捕魚不仁甚矣如因乳母氣血衰弱而乳汁不行者當用十全八珍或六味地黃滋水養肝之法補而行之乳汁自多若果氣血無恙但因氣脈壅塞或初產乳道未通不妨照前法用通草留行之劑而暫用之既通之後卽停其藥不宜過通以傷母元

有等氣血壯盛之婦乳汁過多兒不勝食以致乳汁內瘀逆於肉裡乳房沿皮潰爛兒吮其乳痛不可言予舅嫂曾患此症百治無效必待小兒斷乳之後乳汁下行方免此苦後又患此自新產七日後爛起已爛至八個月予遂擬兔懷湯法用桃仁二錢紅花一錢川芎二錢歸尾三錢以破瘀用淮牛膝三錢使之趨血下行再加神麴二錢炒麥芽三錢以消乳一劑痛止脹消再劑全愈更不用第三劑愈後其乳汁並不缺乏適敷小兒日用之乳所謂有病則病受之也

附鬼懷湯 治乳多食少

赤芍 當歸 紅花 牛膝 水煎服

瘡瘍陰陽論

谿上江子卿

瘡瘍最要分別陰陽陰陽不分無從著手動手卽錯或謂陰陽分于氣血也不知氣血亦分陰陽之一端而不可執之以槩定陰陽也蓋瘡瘍有陰症有陽症有陰熱陰寒有陽熱陽寒有陰滯陽滯寒滯有陰陷陽陷有先陰變陽有先陽變陰名各不同也病不同而何以辨之陽症必熱陰症必寒陽症必實陰症必虛陽症之形必高突而腫起陰症之形必低平而陷下陽症之色必純紅陰症之色必帶黑陽症之初起必疼陰症初起必癢陽症之潰爛必多其膿陰症之潰爛必多其血陽症之收口必輕爽陰症之收口必沉重陰熱者夜重而日輕陽熱者夜輕而晝重陰熱者飲溫湯而作嘔陽寒者飲冷水而欲吐陰滯者色紫黑而不變陽滯者色微紅而不化陰陷

者色黯黑而不起陽陷者色紅黃而不起先陽變陰者始突而不平初害痛而後害
癢也先陰後陽者初平而潰始患熱而後惡寒也陽中之陰者似熱而非熱雖腫實
虛若黑而非淡欲痛而無膿卽浮而復消外盛而內腐也陰中之陽者似冷而非冷
雖虛而實腫雖淡而似赤若燥而熱痛旣平而實突外淺而內橫也陽變陰其人多
肥陰變陽其人多瘦陽變陰者服涼藥之過也陰變陽者服熱藥之驟也陽變陰者
多死陰變陽者多生以此消息之萬不失一苟以氣血分陰陽或以癰爲陽疽爲陰
未爲通論蓋癰疽各有陰陽必氣兼補而佐之消毒始能奏功甚速倘執陽病是氣
而不敢用補氣之藥毋論未潰之前火毒不能遽散卽已潰之後肌肉何能驟生單
用一味補血無濟於事也必補氣以生血則氣兩旺氣得而流通亦血得氣而充足
何懼火毒之不散哉倘執陰病是血熱而不敢用補氣之味尤爲不可總之氣血不
可失治而瘡瘍必當兼用之也惟是陰陽之症不可不分知是陽症可少用金銀花